

民國二十五年十月

交通史總務編

俞允鵬著



交通史總務編

第五章 庶政

第一節 機關

第一款 憲政研究所

光緒三十四年八月詔旨預備立憲限內外各衙門將此後九年應行籌辦要政分期奏明於是郵傳部遵旨特設憲政研究所於部內以左丞李焜瀛右丞李經楚左參議梁士詒右參議胡祖蔭爲提調丞參上行走陳毅林炳章爲副提調以葉恭綽陳應濤畢承緝何葆麟章華胡維賢庚耆阮維和蔣尊禕同林何啓椿周炳蔚爲股長賀良樸等二十人爲股員本處所辦事項具見憲政籌備章第一節第二節內宣統二年二月十八日奏改爲憲政籌備處

第二款 憲政籌備處

宣統元年十二月二十日憲政編查館奏請飭京外各衙門設立憲政籌備處以歸劃一二年二月十八日郵傳部乃改憲政研究所爲憲政籌備處奏聞奉旨依議

郵傳部尙書徐世昌奏摺

宣統元年十二月二十日欽奉諭旨憲政編查館奏請飭京外各衙門設立憲政籌備處並將十月十三日上諭恭書懸挂一摺着依議欽此欽遵咨鈔到部原奏內稱擬令京外各衙門一律設立籌備處並聲明從前所已設者由各該

衙門改易今名等因竊維預備立憲頭緒紛繁自非專設機關無以提挈綱要况臣部所司交通各政與憲政進行之遲速均屬息息相關尤應急起直追方足以利推行而期進步查臣部原設憲政研究所由臣等督率丞參以下各員隨時規畫所有九年籌備事宜暨第二屆籌備成績第三年籌備實情迭經奏咨在案茲值奉旨設立專處俾資籌備自應遵照憲政館所奏改為憲政籌備以昭劃一凡臣部所轄各政已辦者應如何考查成績未辦者應如何督令成功其關於預算者應如何稽覈盈虛以時酌劑其關於核議者應如何研究利弊以慎推行仍由臣等責成丞參督同該處員司認真經理並遵將上年十月間欽奉上諭恭書懸挂藉資惕勵總期九年以內漸臻美善以冀仰副朝廷立憲求治之至意其原派各員尚未支薪應仍照舊辦理合併聲明除將該處員名咨館查核外所有臣部遵設憲政籌備處緣由謹恭摺具陳

同月派左丞李焜瀛右丞李經楚左參議梁士詒右參議胡祖蔭充提調丞參上行走陳毅林炳章充副提調司員葉恭綽陳應濤畢承緝何葆麟章華胡維賢庚耆阮維和蔣尊緯同林何啓椿周炳蔚充股長五月加派翰林院侍講雲書爲副提調

同年六月尙書徐世昌諭九月初一日爲資政院第一次開院之期本部奏派之憲政籌備處亟應切實籌辦以備舉行所有前派該處提調副提調暨股長股員著於每星期齊集該處二次將本部所轄各項要政妥慎籌議隨時回堂核辦八月署尙書沈雲沛諭本部現擬接收郵政推廣航業以及籌備憲政事務殷繁須有專員管理方免貽誤應將憲政籌備處川粵漢籌備處併爲本部籌備處名則劃一事則分任以收策力之效原派人員仍照舊辦理（本處所辦事項具見憲政籌備節內第一款）

民國交通部成立本處隨郵傳部一併取消

第二款 憲政實施籌備委員會

民國十三年二月國務院爲籌備實施憲政函交通部請組織憲政實施委員會

附國務院致交通部函

據本院憲政實施籌備處呈稱實施憲政頭緒萬端各部院處非各有負責籌備之機關不足以策進行而收實效竊由本院分函各部院處各設籌備實施憲政機關定名曰某某部或院或處憲政實施籌備委員會尅日組織成立等語查現在憲法業經公布該處呈請各部院處組織憲政實施籌備委員會一節自應從速籌辦以資進行除分行外相應函達查照辦理

同月十九日交通部部令公布憲政實施籌備委員會章程

附交通部憲政實施籌備委員會章程

第一條 交通部爲籌備施行憲法上屬於本部主管事項設立憲政實施籌備委員會

第二條 憲政實施籌備委員會之職務如左

- 一 關於憲政實施手續之研究事項
- 二 關於憲政實施上之解釋事項
- 三 關於憲法規定與各官署及地方劃分權限事項
- 四 關於根據憲法應行擬訂或修正各項法律案及法規事項
- 五 其他與憲法關係事項

第三條 憲政實施籌備委員會設委員十五人由 總長於本部職員中派充之

第四條 憲政實施籌備委員會所辦事項隨時具案呈請 總次長核奪

第五條 憲政實施籌備委員會所辦事項與主管各廳司有關係者應先會商接洽

第六條 本部派赴國務院憲政實施籌備處委員應隨時將該處所議及應行接洽事項報告本會其經該處議定屬於本部應辦之事項本會各委員應分任之

第七條 憲政實施籌備委員會設事務員及書記若干人由委員于部員中遴選呈請核派

第八條 憲政實施籌備委員會各職員均不另支薪津

第九條 本章程自公布日施行

同月部令派陸步熊于燧年包光鏞殷泰初祝書元蕭永熙顏德慶閻作霖張毓書劉成志尤桐孫百英吳昆吾汪文璣兼充憲政實施籌備委員會委員四月派徐洪充憲政實施籌備委員會委員

三月本會各委員會商擬定辦事規則六條呈交通部核定派陸步熊爲主任委員復指定劉成志孫百英吳昆吾汪文璣爲駐會辦事委員

附憲政實施籌備委員會辦事規則

第一條 本會設主任委員一人由次長於委員中指定之主持會內一切事務

第二條 本會設駐會辦事委員四人由次長於委員中指定之輔佐主任委員整理會務并研究本會章程第二條所列各事項

第三條 本會每星期開會一次於星期四行之但因特別事故得開臨時會

第四條 本會開會時以主任委員主席如因事未能出席得委託其他委員代理

第五條 本會開會時如委員因事不克出席得委託代表列席與議

第六條 本規則自呈奉批准日施行

本會組織成立經開會十次討論籌備實施各辦法（詳見憲政籌備節）嗣因政府改執政制憲法無效同年十一月二十八日交通部令本部憲政實施籌備委員會著即裁撤

第四款 圖書通譯局

第一項 起原

清光緒三十三年郵傳部尙書陳璧以舉辦路電郵航四政非借鑑各國成規不足以資取捨於是年六月奏定郵傳部官制摺中聲明在部設立圖書館通譯局各一處八月諭本部奏設通譯局圖書館正在妥籌辦法一時未能成立現先設一通譯圖書處酌派通譯能員將調取各國船路電郵四政各件有關於我國辦法者迅速譯出遴選通才以總其成派調部行走擬保顧問官湖北存記道宋育仁爲總辦員外郎孫寶瑄協同辦理陳壽彭孫筠充總通譯所有本部官報事宜歸併該處迅速籌畫早日出報以興新政九月初六日諭檢討林步隨調充圖書通譯處協同辦理九月初四日郵傳部片奏設立圖書通譯處奉旨依議

附郵傳部尙書陳璧奏片

再臣部會同軍機大臣奏定本部官制清單聲明擬設圖書館通譯局兩處業經奉旨允准在案現在遷入新署規模粗備亟應購置東西圖籍藉爲研究四政之資茲擬暫於署內共設圖書通譯處一區先立基礎分咨出使大臣調取各國船路郵電規則章程酌派能員分類繕譯並遴選通才以總其成查有湖北存記道宋育仁留心新政稽覈精詳擬請派爲該處總辦並派充臣部二等顧問官一俟局面擴充再當分設館局以符原奏謹附片具陳

十一月尙書陳璧諭圖書通譯處現經憲政館送到書籍並前存司各國各書籍種類最多應即派員編纂成書俾資研究

參議廳食事陳毅兼充總纂知縣陳壽彭派充幫總纂准分編譯編輯校勘三科辦事所有前派在該處各員暫作科員務必勤慎將事毋稍遲延是爲至要

同月改圖書通譯處名爲圖書通譯局二十八日片奏請頒給關防奉旨依議

附郵傳部尙書陳璧奏片

再臣部奏定本部官制清單內開應設圖書館通譯局兩處嗣後奏明暫於署內共設圖書通譯處一區先立基礎均經奉旨允准在案查臣部搜羅四政各圖書及各項合同章程均須詳細編譯擬統設圖書通譯局以資編纂應照臣部各廳司鑄頒印信成案請由禮部鑄銅質關防一顆文曰郵傳部圖書通譯局關防以資信守恭俟命下欽遵咨照辦理先由臣部刊刻木質關防頒發該局開用謹附片具陳伏乞聖鑒

第二項 成績

圖書通譯處改爲局後廣續編譯書籍並着手編案修律

三十四年正月尙書陳璧諭圖書通譯局分設各科目自應派員辦理以專責成派邢端陳士芭陸夢熊充編譯科科員龔書黃嵩齡充編輯科科員其校勘科所設印刷所除已派金恭壽林壽熙兼管該所一切庶務外加派候補同知許炳璜前禮部主事林師望充校勘科科員各宜勤慎從公毋負委任

三月各駐使咨送到鐵路國有民有法律派圖書通譯局迅速分譯彙編刊布以資研究勿得稍延四月尙書陳璧諭咨取各國國有民有鐵路法律將次到齊前飭圖書局迅速譯出排印尙未就緒專派秘書郎雲書主事程明超僉事曾毓堯督催限五月初一日以前編次成帙以便分別施行

同月尙書陳璧諭因各廳司新定烏布業經分別派充所有圖書通譯局亦應一律更定署右參議陳毅派充總纂候補主

事陳壽彭進士程明超派充幫總纂翰林院秘書郎雲書檢詩邢端派充纂修員外郎王樹藩充協修同知許炳璜充詳校員外郎金恭壽道員林壽熙派充稽查印刷所從前所派各員及分科字樣一併銷去現在各員不敷編輯候隨時再行派充本路對待商辦各路尙未定有法律該局速查歷次駐使咨到各國對待民有鐵路各法律彙輯專書印刷施行爲修訂路律之攷證勿稍延緩嗣又添派陸夢熊蘇輿爲纂修五月添派周嵩堯爲纂修又諭編修程明超升派總纂著將調取各圖鐵路章程會同在局各員迅速編譯並釐訂辦事章程呈候核辦實行

八月尙書陳璧諭圖書通譯局歷派多員原爲分任編輯路律及交通沿革事略起見乃近日各員於午後一二時往往陸續出署趨至全局無人並本司應辦事宜亦漸疏懈推原其故皆因應辦之事未經指定致於無可措手亟應分認功課各事責成除原派專修路律之林蔚章夏和清陳宗蕃張智遠四員仍舊任辦路律外其陳壽彭張恩壽蔡匯東派充編輯船政沿革事略蘇輿張鴻藻曾鯤化朱路何雲倬派充編輯路政沿革事略雲書姚華熊坤陸夢熊王樹藩派充編輯電政沿革事略周嵩堯楊允升劉遠駒派充編輯郵政沿革事略許炳璜保桂段錦林派充該局內收掌校對抄繕等事自此大分完之後各員務須按日到局限定時間調集案卷迅速編輯每十日各將現編之件呈堂查驗總期尅日告成以徵成績即現時出差各員回署日仍隨時由總纂回堂派入各項協充編輯除修訂路律各員毋庸到司辦事其餘各司員每日以局尋平均時刻定限辦事總纂有督率各員之責亦須常川到局主持一切庶不至曠工誤事九月又諭圖書通譯局前經派定各員分任編輯四政沿革事略除修律各員業已改派外所有編輯校理等事亟應派員分任以專責成翰林院撰文雲書候補郎中借補電政司員外郎蘇輿候選員外郎王樹藩內閣候補侍讀周嵩堯以上四員派事任編輯船政司主事姚華內閣中書朱路畢業生何雲倬以上三員派幫同編輯候補主事陳士芑顧準曾二員派事任校理自此大派定之後務各常川到局分功辦事以期早日告成其分司各員仍遵前次堂諭兼顧本司毋稍疏懈十二月又諭本部設立圖書局注重修律編案彙攷四政得失前此局員未備譯才尙泛故有延聘外間編輯或自譯成書亦爲購置固一時權宜之計現徵

調有人自應厘訂辦法所有修律編案譯書等事在局各員分別緩急担任辦理除關係要需之書本部指定僱譯外其携稿來售及發請書譯者一概停止以節糜費

宣統元年閏二月尙書李殿林諭法部員外郎張煜全派充英文總校三月又諭總纂陳穀派管理圖書事宜總纂程明超派管理編譯修律事宜纂修雲書升派總纂管理編案編制事宜統歸丞參稽核四月二十五日尙書徐世昌奏試辦交通研究所並整頓圖書通譯局情形（見交通研究所）

五月尙書徐世昌諭圖書通譯局奏設以來事務漸繁茲酌定新章俾資遵守所有原派該局總纂以次各員均按新章改派以專責成程明超雲書改充提調陸夢熊張煜全派充英文總編輯蔡匯東派充東文總編輯曾鯤化王樹藩派充總編輯章棧劉鍾琳夏和清張智遠劉遠駒楊允升何雲倬派充編輯許炳璜派充掌書保桂派充庶務長段錦林派充庶務員此次派定之後兼差人員須已初到局辦公另由該局即擬具辦事細則呈候核定並設任事簿由各該員逐日登載每月呈堂閱看又諭本部籌畫交通須備詳細地圖以資參攷圖書通譯局測繪處總辦以劉道仁派充陳壽彭派充幫辦督率測繪員生妥速辦理又諭程明超陸夢熊張煜全專辦圖書局事宜無庸在廳司行走六月又諭簽分本部七品小京官林先民派庶務司學習行走調部差遣畢業生曾紀熙派圖書局測繪處技術長並會同印刷處籌辦各種印刷事宜十月派主事唐德萱兼圖書通譯局德文總編輯知縣黃爲基派兼圖書通譯局日文總編輯譯書處總編輯王樹藩改歸編書處辦事並派張鴻藻充編書處總編輯陳威陳福頤升譯書處總編輯李湛田充輯錄股股長黃爲基充輯譯股股長十二月改派參議廳二等科員上行走陳壽彭爲郵政司二等科員在圖書局測繪處改訂中國江海險要圖說草擬章程

二年正月尙書徐世昌諭分部郎中蒯壽樞派充總編輯三月又諭圖書通譯局現編光緒交通史派訓導李聯庚爲專辦員並派主事朱路幫同辦理四月又諭總編輯程宗伊派充會計總核所有該局出納事宜均由該總核查閱後再行呈堂具領以昭慎重五月派圖書局行走盧靜遠充總編輯六月又諭圖書局庶務長派雷起龍接充迅定分職辦事章程迅會

計事務仍受總核稽查七月又諭譯書處總編輯曾鯤化派充該處總核所有該處發譯收稿發印各事均責成該員嚴加攷核同月署尙書沈雲沛派留學畢業生王祖邵兼圖書通譯局幫提調准陸夢熊開去總編輯差

本局專職在修律編案譯書三者律則商辦鐵路律及施行細則完全藏稿鐵路營業律編竣一半移交參議廳案則四政沿革按月選登官報惟光緒交通史大清鐵路地理圖志及中國江海險要圖說尙未成書譯書則向分二項一局員自譯二購稿統由各專門總編輯刪訂總核鑒定然後刊行購稿之酬資以俄德法文爲上英文次之日文又次之每千字定酬金六元四元二元不等大率視譯件之難易譯筆之明暢與否以爲等差付梓之書多至十餘種如左表所揭

附圖書通譯局譯印書籍表

(一) 局員自譯	
英國鐵路條例摘要	陳壽彭譯
法國幹綫鐵路營業律	曾鯤化譯
日本郵律詰義	曾鯤化譯
各國監察商路法彙編	局員合譯
以上均經刊行	
(二) 購稿	
歐美電信電話事業	李兆鼐譯
通信要錄	李兆鼐譯
水運	楊志洵譯

墨西哥共和國鐵路律	彭祖庚譯
鐵路運送論	陳宗蕃譯
以上均經刊行	
中外鐵路約章	石襄善譯
英國路律	石襄善譯
美國鐵路改定轉運價目	宋發祥譯
俄國鐵路全律	李家鏊譯
俄國鐵路普通律	李家鏊譯
德國鐵路運輸章程	林文德譯
日本鐵路法規彙抄	張鼎治譯
浜士威鐵路免票乘車章程	金樹聲譯
法國鐵路規律	李世中譯
美國鐵路律摘要	章乃煒譯
法國鐵路運送規則	伍守彝譯
法國路律摘要	鄭誠譯
法國鐵路組織考	黃康年譯

以上未印

宣統三年正月二十四日郵傳部以圖書通譯局人浮於事用費浩繁奏請速同交通研究所一併裁撤奉旨依議

附郵傳部尙書盛宣懷奏摺

再臣部於光緒三十三年奏設圖書通譯局分譯各國船路電郵規則章程嗣後升任尙書臣徐世昌奏將該局厘定職掌試辦交通研究所復奏擬訂船路電郵四政專律揀派游學畢業生爲起學員統歸參議廳編纂科辦理並奏派升任僉事陳毅總司纂核歷經分辦在案臣等查編律各員都係熟習洋文而四政所取資亦必廣搜羣籍融會中西兼譯歐美之書詳究交通之故似與圖書通譯局所辦之事本歸一轍而要較爲切要陳奏所云該局行走人員誠爲不少且廳局分立迹近駢枝今擬酌歸併以期統一凡圖書收掌責諸編纂科通譯事宜任諸起草員所有圖書通譯局及交通研究所應即裁撤其調局人員另候委用俾昭核實而省繁複是否有當伏乞聖裁訓示謹奏

同月尙書盛宣懷諭圖書通譯局既經奏裁其在局所員司仍歸原處辦事至調局人員另候委用所有該局圖書文卷及宜報印刷所機器各件即派章華羅惇勗趙煊夏和清點收造冊存核二月又諭圖書通譯局現經奏裁歸併參議廳編纂科派該廳司員陽景新王新銘沈忠贊管理圖書事宜克與額明煥榮管理印刷事宜王恩博戴旭管理譯稿事宜李廷芳郭則洵管理發售書籍事宜

第三項 印刷處

光緒三十三年十一月尙書陳璧諭圖書通譯處現經派員編譯書籍應設印刷所派署主事候補員外郎金恭壽庶務司

行走直隸候補道林壽熙兼圖書處行走稽查該所機器匠徒一切事務是月二十八日奏改圖書通譯處爲圖書通譯局印刷所仍舊隸於局宣統元年五月圖書譯通局改組尙書徐世昌諭電政司員外郎潤璋派圖書通譯局印刷處幫辦又諭圖書局印刷處應添購機械以資應用該局編輯錢家澄此次出差歸途經過上海可就近攷查購辦俟該員到上海時由圖書局電傳遵照又諭候補道章邦直派圖書局印刷處總辦即用知縣錢家澄改派幫辦宣統二年正月又諭潤璋准其開去幫辦兼差承政廳攷績科科長唐浩鎮派充印刷所幫辦三月初八日奏請將印刷所改爲印刷處派章邦直爲總辦

附郵傳部尙書徐世昌奏摺

竊爲印刷之事雖近營業而東西各國往往董於有司者蓋上以謀文牘之整齊下以防契約之詐僞實於行政有極大關係非細故也是以水印暗花杜弊之方日密電胎銅板改良之術日精列國注意職是之故近年如度支部及湖北四川江南河南江西等省先後奏設印刷局經奉旨允行各在案現在臣部修訂專律編纂案卷以及譯述外國典籍長篇巨帙已有成書從前交商印行式樣未能一律且有應接不暇之勢而船路電郵各局需用印刷等件又或取諸歐洲每年支銷爲數甚鉅是發交商局既患紛歧所辦外洋復慮溢出更有甚者近年京奉鐵路竟有手持作僞本票攬入旅客希圖弊混情事雖經查出而講張爲患尤不得不籌杜絕之法臣等公同商酌已就銜署東隅舊有房屋重加修葺作爲臣部印刷處所有部內一切印刷事宜以及外局每年需用船票車票郵票收發電紙貨單冊籍文牘帳簿封套信紙碼單各件概歸該所承辦以昭畫一而杜漏卮其民間或外衙門有願交該行印行者應准其一律按照市價代爲辦理藉可擴張惟事屬創舉非有辦事結實之員不足以資管理查有江蘇候補道章邦直篤實老成熟習商務堪以派充該所總辦遍經臣等札飭該員到所任事並發給成本銀購買德國最新之機器現已陸續購妥漸次運京其一切技手藝徒正在招集一俟辦有餘利再行酌扣本銀所有設立印刷處並派員經理緣由理合恭摺具

陳伏乞皇上聖鑒謹奏

六月以圖書局原設之印刷處規模過大改爲排印處改派張時保桂艾慶鏞將現有機器鉛印詳加檢查妥爲籌算務使增購之時不至缺欠重複並開列預算表移交會計科辦理

第五款 郵電派辦處

光緒三十四年郵傳部謀郵電合辦派員籌辦郵電總局八月尙書陳璧諭本部管轄郵政電政應仿照各國辦法歸併一局庶於匯兌儲金二事徐圖擴充電政既贖爲國有郵政亦當照稅務處來咨訂期接收派丞參上行走龍僉事建章林編修炳章辦理郵電總局開辦事宜務即悉心妥議呈候核准施行九月又諭本部暫設郵電派辦處籌畫郵電合辦及一切預備至實行應辦各事宜該處所辦事件與郵電兩司交涉甚多派郵政司郎中同林電政司員外郎曾毓雋主事蔣尊綽譚祖任兼在該處辦事俟組織成立改設總局後再行派充總科員以下差使尋派調部差遣候補主事陳錄兼該處議員派調部差遣候選布理閣徐洪爲議員十月派調部差遣法部員外郎張煜全爲議員十一月派調部差遣議敘知縣張國鈞調部差遣候選道周炳蔚調部差遣外務部法文繙譯官分部主事文惠爲行走十一月尙書陳璧諭郵電派辦處既已設立試辦調到各司員應行分認功課以期發達派徐洪張煜全合譯稅務處所送英文冊件文惠譯法國郵律陳錄照料外交規畫各件張國鈞司案檔

宣統元年正月派辦處以郵電兩政接收難期公請裁撤尙書陳璧諭前設郵電派辦處調派各司員籌備接收事宜今接收尙未有期無事可辦接派辦處公請暫行裁撤自爲核實起見著將郵電派辦處暫行裁撤除兼差人員仍歸各廳司辦事外餘俟開辦郵政再酌行差委

第六款 統計處

第一項 緣起

清光緒三十三年九月十六日內閣奉上諭本日憲政編查館請飭各省設立調查局各部設立統計處各摺片現在該館開辦編制統計二局非有京外通力合作辦法無以推行盡利至統計一項尤宜由各部院先總其成著各部院設立統計處由該管堂官派定專員照該館所定表式詳細臚列按期咨報以備刊行統計年鑑之用郵傳部奉旨後於署內設立統計處因案卷多未調齊未派人經理三十四年五月郵傳部因各局應行調查之件業已陸續呈報應派員經理令派俞事尹家楣龍建章等充提調纂修等職撰列表式暫行試辦十二月二十二日郵傳部尚書陳璧擬訂辦事章程並刊刻木質關防具奏奉旨郵傳部奏邊設統計處擬定章程表式並請刊木質關防摺單各一件著依議

附郵傳部尚書陳璧奏摺

竊維理財之經在循名以核實爲政之要貴挈領而提綱故泰西各國於統計一門視爲推行政事之準則卽中國夏書禹貢洎史漢以下各書莫不分類編輯釐然悉當臣部職司四政皆有營業性質舉凡交通之靈鈍貿易之盛衰按年工程之遠近各省局所之增加已辦者如何改良未辦者如何推廣尤必列表繪圖樹爲標準方能觸目驚心力求進步以仰副聖主勵精圖治整頓實業之至意臣等當就署中設立統計處擬訂辦事簡章由司員中遴選提調纂協修各員分司其事將四政應有之範圍分門別類各繫以表俾已成之政得按利以究其利弊未成之政得懸格以冀其完全開辦迄今列撰表式計成二百五十餘種臣等督率司員再三研究作爲暫行試辦一俟憲政編查館核定表式再行遵照辦理以期盡善除將現成之表由臣部咨明憲政編查館查核一面刊刻表式發交臣部所轄四政各局所按表照填並飭司員就部中現有卷帙報告一律先行填註以期參觀互勘早日成書再行續咨憲政編查館以備

統計年鑑之用外應將統計處章程繕具清單謹呈御覽恭候命下卽由臣部欽遵辦理並擬由臣部刊刻木質關防一顆發給統計處以昭信守所有遵設統計處緣由恭摺具陳伏乞皇上聖鑒訓示

第二項 組織及進行

三十四年五月郵傳部尙書陳璧諭僉事尹家楣署僉事龍建章派充統計處提調翰林院秘書郎雲書編修程明超檢討陸夢熊王建祖候補郎中羅惇勳蘇興候補主事姚華內閣中書周嵩堯派充纂修學習七品小京官宋真四川候補縣丞黃大琮派充收掌各該員務當悉心研究斟酌中外以期整齊畫一咸利推行毋負委任又准憲政編查館咨開光緒三十四年四月初十日具奏酌擬編輯政要一摺奉旨依議欽此遵鈔到部旋將編輯政要辦法六條咨送前來亦應亟爲修訂分門別類輯錄成書以便咨送所有編輯事宜卽併在統計處分科辦理

十一月尙書陳璧諭本部設立統計處分爲圖表編制兩門定有規則近查學部法部陸軍部農工商部度支部民政部大理院率已分造圖表咨館備核陸續具奏本部各項圖表尙未研究完備事關奏案未可過遲計輪路電郵四政外尙有合署官制一切進出款並所轄之實業各學堂交通銀行等項均應列表尅期將表式審定提早奏報不至居各部院之殿後成原派之纂協修陸夢熊姚華顧準曾陳宗蕃四員速核圖表並暫調圖書局之曾鯤化林蔚章二員幫同編纂於前開各項分門擔任限十二月初十內呈稿以憑封印前具奏當此趕辦圖表之際各員凡有本司及兼差處所暫於十二月初十日不必到差至編制一節其原派各員此次未經指定製表者均應由兩提調督率分門編制每旬限繳功課若干俾纂成圖表後按格照填

十二月二十二日郵傳部奏定統計處辦事簡章十二條

附統計處辦事章程

第一條 臣部統計處專司統計交通事宜綜覈船路電郵四政及其餘所管一切事務分別列表以資比較而臻完密

第二條 臣部所辦統計表擬分正附二項正表咨送憲政編查館以備刊成統計年鑑之用附表爲本部豫備編輯年報之用

第三條 船路電郵四政均有專設局所管轄擬飭各該局所設統計專員遵照臣部所頒規則將應行統計事項隨時造具報冊圖表呈送臣部以憑計核

第四條 四政中有非臣部專設局所管轄者擬製定表式咨行各省督撫轉飭勸業道及調查局查明照式填報臣部

第五條 臣部所辦交通統計一切事件均照各局所及各省造報者據事直書分類編輯至應行准駁之處仍由該管各司局處核辦以清權限

第六條 統計處分設五科如左

總務科 掌臣部官制財政及附屬本部各項事務之統計

船政科 掌外江內港各輪船及航路標識各項統計

路政科 掌各路工程機械營業各項統計

電政科 掌電報電話電燈各項統計

郵政科 掌郵政局信局及銀行各項統計

第七條 統計處置司員如左

提調二員 綜理統計處一切事宜併核定稿件表式